

## Ei Ei

Jetz iss Ostern erum unn mir hawwe dess Wischdigsde vumm Osterfest, dass unser Herr Jesus Christus von de Tote auferstonne iss, beiere scheene Fernseh-Mess mettgefeiert.

Nodierlich hawwe merr onn de Feierdaache nor Gutes gesse unn nor gut Wasser unn gude Woi getrunke. Dess geheerd dezu, awwer noch mieh zu Ostern geheern die Ostereier, die farbische Hinkelseier, die de Osterhas su frieh omm Ostersonndaachmoie bringe dut, dass noch koon Mensch den gesehe hott, obwohl der doch meddere Kiez voll Eier uffem Buckel nitt su schnell hibbe kann wie soi Kumpels, die Feldhase. No ja, als merr Kinner warn, hawwe die Mudder unn de Vadder uns verzählt, dass dem Has noochgeguggd unn grad noch geseh hawwe, wie soi longe Ohrn zwische de Dickworrz verschwunne sinn. Unn weil kooner vunn uns doodroo gezweifeld hott, hawwe mir dess unserne Kinner unn unser Kinner dess unserne Enkel verzählt. Iwwerrisch gebliwwe vunn su Geschichte sinn die Schokoladehase in Silber- odder Goldpapier. Schee, wie die uffem Disch sitze unn druff wadde, dass gesse werrn.

E onner Sach unn isch waaß nitt woher dess kumme dut: Moi täglich Friehstiggsei ess isch nor mett Salz, awwer bei de Ostereier brauch isch koo Salz, die schmecke aach su. Isch glaab, dess kimmt doodefoo, dass joo aach die Aache mettesse unn dass vumm Gugge die Farb uffem Ei de Geschmack verännerd. Besonnens donn, wenn die Eierschal e bissi gerisse unn enn Farbstreife uffem geschälte Ei se sehe iss.

Als junge Leit hawwe merr mett de Ostereier ab unn zu su e bissi Jux gemachd unn hawwe die Eier geeschenonner gedotzd, unn wem soi Ei kabutt gonge iss, der hadd verlorn unn musst soi Ei dem Geescheiwwer gewwe.

Doo fällt merr noch oi, dass um die Zeit wie jetz in de Wertschafte große Gläser voll mett Soleier gestonne hawwe, also mett Eier, die e paar Daach im Salzwasser gelesche unn dessdeweese gut salzisch geschmeckt hawwe, aach konnt merr se dort ei Zeitlong uffhewe, ohne dass schlecht worrn wärn. Obs die Soleier uff de Thek heitzedaach noch gewwe dut, dess waaß isch nitt, isch kumm joo nimmi unner die Leit.

Eiern Honnes